

## Eta macartane ema Apóstole Pedro, ticaijare **1 PEDRO**

<sup>1</sup> Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia. <sup>2</sup> Emutu eti, yátupiquenehi eta manerejisirahehi ema Tata Vicaiyaquene taicha tacahéhi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta ítaresirana, máimicatasirahehivare eta esuapajiraivahi me Viya. Puiti, nuvaraha tajurucaini eta ecaicutiaraira eta máemunasirahehi ema Viya; tájinavare tahapapiricahini eta táurivahi eta epanereruana.

*Vijacapayare eta vícuchihi te anuma te tauri eta  
vítaresiraina*

<sup>3-4</sup> Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásicha, viratahahi vicamichahi tamutu eta viátajivana

te juca vítaresirana taicha vicuchapahi eta sácheyare visiapaya eta mávasa ema Viya. Maitavacacayare eta vítaresirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tamauriqueneana. Maitavacacayare eta iúrisamurereasiravanayare. <sup>5</sup> Puítisera, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhahayare te jena sache táepaniravayare eta viúritaresiraya.

<sup>6</sup> Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihí vaipa táunaimahi eta ecatajivairaya. <sup>7</sup> Ema Viya másapahi eta juca ecatajivairana, mavarairahi ímereuChavayare eta yátupiquenehi eta ecasiñavairahi eta mayehe. Ecutiyare eta oro te nacaitsamaraji te yucu te yátupihipuca étaquenehi. Étisera étaviviriacahi eta tatumeva eta oro, taicha eta oro titavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

<sup>8-9</sup> Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásicha, ichapeyarehiva eta iúrisamurevaya, tájina eviyaimahi ácayemahini eta ecunachiraya éma, te jena sache iúchucuhainapa eta ítaresiraya

máichecuaraquirenapa. Étasera eta táitsivahi eta ecasiñavairahi mayehe ema Viáquenu.

**10-11** Eta juca viúchucuirayare, acaneripahi eta tacaecherairahi. Énaripa ena víyarahahanaini profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énasera ena profetana vahi náimatin mahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta máijareya? ¿Tájamuhuyarepuca eta máimeresiravaya?

**12** Émasera ema Espíritu Santo (ema másihaqueñehi te anuma), mametacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítareruanaichaha, vítipa vímatihi éma. Te vicametarairupa mayehe ema Jesucristo, ema Espíritu Santo titametacahehi te esamureana. ¡Tétavicavayare eta viúricacarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táichararacavayare eta viúricacarevayare.

*Ema Viya, eta máichuirahavihi, mavarahahi tépachinachahaviyare eta vítaresirayare*

**13** Eta tacahé, ecaratacava tayehe eta epanereruana, táurivainavare eta ítaresiraya. Ecasiñavayare eta ejacapirayare eta ícuchihi me Viya, máijararuheyare te machavapa ema

Viáquenu Jesucristo. <sup>14</sup> Ímerecavayareva eta machichairahahehi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya. <sup>15</sup> Puítisera, sánturuhahénapa eta ítaresirayare. Taicha ema tíchuhahahehi, tétavicavahi eta masantuvahi. <sup>16</sup> Taicha ema Viya, ani macahehi eta máechajiriruvahи tayehe eta Sagrada Escritura: “Nuvaraha sántuhéna eta ítaresiraina, taicha nútì, yátupiquenéhi eta nusantuva”.

<sup>17</sup> Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavacahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana puiti juca ítaresiraichaha te juca apaquehe. <sup>18</sup> Ema Viáquenu Jesucristo ticuchucuhaheripa tayehe eta tamaurivainihi eta ítaresirana, iámapiricaichaha eta nayeherepianaini ena iáchucanaveánaini. Écharichuhi éti eta mavacharesirahehi ema Cristo eta iúchucuirahi, vähisera te plátainahini, óroinahipucaini. <sup>19</sup> Étasera eta máitine máepusairuhi éma eta mavacharesirahehi, étivenéhi ímijararecahi éma, cútiripa te cáijararecasí eta uvesa matapiravarequenéhi. <sup>20</sup> Acane te tépanavainapa eta apaquehe ema Viáquenu Jesucristo ticatuparahaipa tacaheyarehi eta máepeniraya. Vähisera táitauchavavanehini. Tapaenumavapa puiti, títauchavahi eta étavenepa eta iúchucuirayarehi éti. <sup>21</sup> Énerichu táichavenehi eta

éhisirahi ema Cristo, ímatipa puiti ema Viya, ema ticaechepecuahi ema Machicha te máecari. Puíticha téjacaripa éma tayeha eta mávacure te anuma. Eta tacahe, téavicavainehi eta ecasiñavairahi mayehe éma, ecuchapavaipa eta mayehe.

**22** Puiti tipachinaripa eta iáchanevana táchavenehi eta esuapiroha etá yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímerecavainapa puiti yátupina etá émunasiracacahi nayehe ena echamuriana. Evapinavavare etá te esamureana etá émunasiracacairahi. **23** Cape juca, etá ítaresirahi, tájina vahi íturuequenehahini etá iúchucuiraya. Puítipasera machichaheripahi ema Viya. Ítsivachaipahi etá ítaresirainihi etá esuapiroha etá máechajiriruva ema Viya. Éta ticaitarecaheyarehi; jéhevare etá máitavacacahi. **24** Eta Sagrada Escritura, ani tacahehi etá táchajiriruva, májurehi ema víyarahaini profeta Isaías: “Eta vítaresirahi viti achaneanasami te juca apaquehe, vicutihi etá táimarusira etá muiji. Tijurucapa, tásicha tiájjipa. Eta vitumevainihi étapa etá vítupajijiasiravainihi, titavayare tacutihi etá flore: tépunehana, tijiyupa, témiricapa. Étasera etá máechajiriruva ema Viya, jéhevare etá máitavacacahi” tacahepa. **25** Eta juca máechajiriruva ema Viya, étaquenehi etá emetacasivanahi apaesa táuripa etá éhisirahi.

## 2

**1** Eta tacahe, támutupa ínajica etá evainarara-jivanainihi, tamutu etá ecaetemaraivainihi, etá

apipiemairahénihi, eta ecapinaruraivainihi, étapa eta échajivanainihi. <sup>2-3</sup> Puiti, eta ímatiraripahi yátupi eta máurivahi ema Viya, tijurucainapa puiti eta esuapirayare eta máechajiruvana. Ecutinapa eta najurusira ena amuyana. Ánipichichapachu técuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiruva ema Viya, apaesa tiápajucavaya eta ímatiequenehairaina eta mapaneruana.

*Ema Cristo macutihí eta mari máepenacacahi*

<sup>4</sup> Yátupina eta ecasiñavaira me Viáquenu, taicha tétavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha tétavicavahi eta macunachacarevahi mayehe. <sup>5</sup> Éneripa ecahehi éti, ecutiripa eta márijahiana máepenacacahi. Tacache puiti, táuripa eta ecachaneracacainapa. Macarichu ema Viya ema ecaemataneacaya. Tivayuacaheyá etá esuapajiraivaya etá máijarasiraheyarehi etá ématanepachuyare. Énerichuvare ecatuparahaipa sántuhénapa. Ecutiyare ena tiyujaracarähiana etá te Templo. Ecatuparahaipavare eyaseurahiya nayehe ena echamuriana. Étapa etá ecamavahuira me Viya, étaripa etá esuapajiraivahi, etá ehasulupayachirahi ema Viya, étapa etá ecunachirahi éma. Tamutu etá juca, ecurisamurechayare éma, taicha émarichuhi ema Jesucristo ticaitecapinaheyarehi me Viya. <sup>6</sup> Eta Sagrada Escritura, ani tacache etá máechajiruvahí ema Viya: “Núti névatacahi

ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Tétavicavahi eta macunachacarevahi eta nuyehe. Nácani ticasíñavanahí eta mayehe ema nuvaneruyare, vahi máinajiacavacaimahi” macahepa ema Viya.

**7** Éti, tétavicavahi eta macunachacarevahi ema Cristo eta eyehe, taicha yátupihi eta ecasiñairahi éma. Énasera nácani masuapajirairahanahi mayehe, náepuruhi éma, nacuti ena tépiyarecarahiana eta Templo, eta náepuruirahi eta mari ticunacharepanayare eta te peti. **8** Nácani masuapajirairahanahi eta máechajiriruvana ema Viya, tacutiqueneyarehi náepuruhi ema mavaneruhi ema Viya. Nacutihi mácani achane máquipairuhi táichavenehi eta macayutetuirahi. Tisemahi, mavaraha térajicavayare eta tímicayutetuchahi.

### *Ena machanerana ema Viya*

**9** Étisera manerejiruheripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare ena achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhaqueñeheripahi tayehe eta timapicu, tímisiapaheripa tayehe eta táuricacarequene majaraiva éma, apaesa emetajiricaya eta táuricacarequeneana máematanerepi ema Viya.

**10** Cape juca ítaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuirahéhi éma. Puítisera evapinavahi

eta ímatirahi yátupi eta majapanuirahéhi, taicha machaneraheripa.

*Yátupina eta ecaemata neasirayare ema Viya eta ítaresiraya*

**11** Némunaruqueneana nuparapenaveana, puiti éti, tímicutijiricavaichaha estranjerohéhi taicha iáviharichaha te juca apaquehe. Váipasera áyeremahi eta eyanirayare eta iávasayare te anuma. Eta tacache, nuconsejachahe: Vaipa táuricahini íchahini eta tajamurachaqueneana eta iáqueheana. Taicha téavicavahi eta tavarairahi táchamatiequeneha eta iáchanevana. **12** Iúrihisera eta ecachanerarichaha ena achaneana te juca apaquehe máimatiuhanahí ema Viya. Tayanapanerine ticatianacaheana, téchejicanahí eta eyehe ecutihi ena máuritaresirana náicha. Ímerecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta ítaresiranahí.

**13-14** Táichavenenahí eta éhisirahi ema Viáquenu, ímerecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahí eta ley. Éna, ticatuparahanahí náicuñacavacayare ena achaneana váinara jiqueneana, téjecapavanahí. Énasera ena achaneana tiúriana titaurahianahí, ticaemunacasianayarehi. **15** Taicha ema Viya, éta mavarahahí íchayare eta táuriqueneana apaesa ecamatinacaya ena máecharaireana nácani téchajicanahí eta eyehe.

**16** Yátupihi vaipa tapamiruhénahi éti eta esuapirahí eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahenahini, tátetseraruina icha eta tamauriqueneana. Esapihasera ímerecavayare yátupihi eta mavanaraherahi ema Viya. **17** Epicaurahiyare nayehe namutu ena achaneana. Émunajiricacayare nayehe ena vichamuriana. Ímerecapa eta epicauchirahí ema Viya. Epicauchayarehivare ema Emperador Presidente.

*Vácuti ema Jesucristo eta macamichirahi eta mátajivana*

**18** Éti, te ecaematanerecapuca, esuapajirahiyare, epicauchayareva nácani iáquenuanahi. Vahi nacucarichu esuapa nácani tiúriana achaneana. Tácuticaca eta epicauchiraina nácani váinarajianahi. **19** Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya. **20** Téhesera náicuñacahepuca táichavenénahi eta íchirahí eta tamauriqueneana, tájina ecunachacarevaimahi eta ecamichirahí, taicha tatupiruvahi eta ecaicuñairayare. Téhesera táimicuñacahepuca eta íchirahí eta táuriqueneana, ecamichirahí eta náichirahehi, tétavicava eta ecunachacarevaya te mamirahu ema Viya. **21** Taicha ema Viya, eta máichuirahéhi, mavarahahi ecutiyarehi ema Cristo eta macamichirahí tamutu eta mátajivana íchavenehi éti, mavarairahí ecaravahu

eta máurivahi, ecutiyarehi éma eta macayehera paciencia. <sup>22</sup> Éma, tájinahineni maviurevainahini, mapecaturainahipucaini. Nájinavare macaetemaquenénahíni. <sup>23</sup> Te nacaetemajiricapa, éma, vahi mácapaemachavacahíni, macatitiemahipucaini eta náemecatajivachirahi. Máechajicahisera ema Maiya, máimahainehi éma. Taicha yátupihi eta máicuñasiravacaya ena témecatajivachananahi. <sup>24</sup> Yátupihi ema Cristo ticaicuñahi víchavenehi víti eta vícuñayaréni vícuchinihi táichavenehi eta vipecaturana. Tétavicavahi eta mátajivana te máquehe eta náemetatasirahi eta te crusu. Macamichahisera tamutu, mavarahahi vaipa tacuvayuacahavi eta pecatu, tatupiruvayarehi eta vítaresiraina. Eta majorana, éta ticanaracaheyare. <sup>25</sup> Eta ítaresirainihi acane éti, ecuti eta uvesa táemitiaru. Puítisera iávhácaripa ema Cristo, émapa tijaneacahehi, ticatiuchahehivare eta iáchanevana.

### 3

#### *Tiúriyare eta nátaresirayare ena nacaimaque-neana*

<sup>1</sup> Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máechajiruvana ema Viáquenu, ecajimuyasamurechavaca táichavenénahi eta iúrivahi nayehe. <sup>2</sup> Vaipa tacamesaimahi échajirica taicha náimahayare eta esuapajiraivahi nayehe, epicauchirahivare. <sup>3-4</sup> Ímerecayareva eta iúriva yátupiquenehi, tásihaquehenehi te esamureana, tímicutijiricavahi eta iúrina eta emira. Tayanapanepuca

ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamuirihaira étapa eta ecatatasirana, váhivare étaína eta ecayehera oro. <sup>5</sup> Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitaresirana, taicha yátupihi eta nacasiñavairahi mayehe ema Viya. Tásicha, tétavicavahi eta susuapajiraivahi nayehe ena náimanaveana. <sup>6</sup> Ecutiyare esu vénaraha Sara. Suímerecahi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásicha éti, vahi ecupica eta esuapirahi ena ímanaveana. Ímereca yátupina eta iúrivahi nayehe.

<sup>7</sup> Étipa ajairana ecayenaqueneana, ejapanuyare ena eyenana. Ejaneacavare, échahi éna eta vahi túmenahini. Yátupinahisera eta émunasirahi éna, taicha ecuticacayare eta ejacapirayare eta ícuchihi eta ítaresiraya mayehe ema Viya te jena sácheyare. Te iuri nayehe, esamacareya te eyujaraca.

*Tiúriyare eta ecamichirahi eta iátajivana  
táchavenénahi eta íchirahi eta táuriqueneana*

<sup>8</sup> Ámutu éti, ácuticacahi eta epanereruana. Ejapanucaca, émunacacavare nayehe namutu ena echamuriana. Ecajirahi. Mánsuhénahi. <sup>9</sup> Tijuricati natupiacahepuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya vijapanurahiyarehi víti, vicutiyare éma eta majapanuraivahi. Tatiarihiyare táitsivayare

viyehe máicha. <sup>10</sup> Taicha ani tacahehi eta Salmo: “Mácani mavarahahi tiúritaresira te apaquehe, támutuyare sácheana tiúriya, vahi téchajijicaimahi tivayuarecaimahi. Váhivare ticaetemarecaimahi tépiyahirahimahi. <sup>11</sup> Váhivare máichaimahi eta tamauriqueneana. Máichahisera eta táuriqueneana. Macamitiacahi eta semanereana. <sup>12</sup> Ema Viya majaneaca ena náuriqueneana; tisamacareanahi eta nayujarasirana. Énasera ena tíchanahi eta tamauriqueneana, macatianaruuanahi éma” tacahepa eta Salmo.

<sup>13</sup> Nájina tíjaracavaimahi titupiacacheana te náimahahi icha eta táuriqueneana. <sup>14</sup> Tijuricati natiarihipuca ena ticatianacaheanahi táichavenehi eta táurivahi eta ítaresirahi, tásiha, tétabicavaya eta iúricacareva. Váhivare ecupica eta jácani náichirahepuca, váhivare iávamirahuimahi nayehe. <sup>15</sup> Íjaracavasera yátupi eta éhisira ema Viáquenu. Te nayaserecahepuca eta tacayema eta éhisirahi éma Jesucristo, tiúrihi eta ejicapiravacaya tayehe eta ecuchapaquene. Mánshéna éti, epicaurahivare. <sup>16</sup> Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracaheanahi eta táurivahi eta éhisirahi ema Jesucristo, nátsirihapaini eta náechajijisira. <sup>17</sup> Te másapahipuca ema Viya eta náemecatajivachirahe táichavenehi eta iúrivahi, tacunachacareyare mayehe eta ecamichira. Tájinaserá ecunachacarevaimahi te ecaviurevahi.

<sup>18</sup> Yátupi ema Cristo, étaherichuhi vímicapacahi táichavenehi eta vipecaturana. Éma, tétabicava eta máuriva, matapiravarehivare. Tíjaracavahisera

ticatajivaya víchavenehi víti váinajarajiqueneana, mavarairahi tiámahavi me Viya. Tépenahi eta máquehe, étasera eta máchaneva tímiyanavaichucha titareca. <sup>19-20</sup> Tiyanavarepa máejirapanavacahi eta náchanevana ena náepenaqueneanaini nacaerataqueneanahi te infierno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinenihi eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahi eta ichape pacure. Tacahe, te témiricapa eta ichapequene tiquila, macarichuhi ema Noé ésupa esu mayena, énapa ena machichanaveana énapa ena nayenana, óchoanaichuhi ena tiúchucuhanahi tayehe eta ichapequene une. <sup>21</sup> Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vicaicachasirahi te víjaracavapa véhica ema Jesucristo, vahi étaparacaina táepachiacadahavimahini eta viáquehe. Étasera eta vicaicachasirahi, etapa tímereuchahavi eta maperdonachirahaviripa ema Viya tamutu eta vipecaturana. Máepachinachinahaviripavare eta viáchanevana, tájinapa taviuchahavihini, eta visamiravahi te mamirahu. Yátupina eta viúchucuirayare táichavenehi eta máechepusirahi te máecari ema Viáquenu Jesucristo. <sup>22</sup> Puiti éma, tiyanaripahi te anuma; téjacaripa te mavigure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinajarajiana, nasuapahivare.

## 4

*Eti éhicanahi ema Viáquenu, tituparacahe ecaratacavayarehi apaesa vaipa íchaimahi eta tamaurique-neana*

<sup>1</sup> Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Éti apanavare, ecutiyare éma. Vahi iávamirahuimahi eta ecatajivairaya. Nímicutichaheyare eta mácani achane tépenapa, máinajicaripa eta pecatu. <sup>2</sup> Eta tacahé éti, táichavenehi eta iúrujiasirahi ema Jesucristo, tímicutijiricavaipa épenapahini, ínajicaripavare eta pecatu. Puiti eta tápechiravaripa táitarecahini eta iáchanevana, tatuparacahi ecaematacayare ema Viya. Vaipa tivayuacahémahi eta tajamuraraiva eta iáquehe. <sup>3</sup> Tamapurujipa eta táetavisiravaripa eta áñoana eta íchirahi eta tamauriqueneana, taicha emaimatirahi ema Viya. Tamutuhi icha eta tájiparacana, tivayuacahehi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta piesta. Íchahi eta tájiparacana tamauriqueneana eta ejaneasirahi eta esiñarajiana achanelimira. <sup>4</sup> Puítisera éti, vaipa ecasiriquimurihini ena émunacasareana. Vaipa íchaimahi eta táñemahiquene eta náitaresirahi. Ichapemurinehi eta náejiasirahehi. Tásiba, téchajicanapa eta eyehe. <sup>5</sup> Járabajapainapasera eta sácheyare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseserehiraya víti, vitareruanaichaha énapa ena náepenaqueneana.

**6** Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

*Yátupina eta émunajirisiracacaya, ítátijíricacayareva*

**7** Esamanuchaha, tiánehipa eta táitavirayare tamutu eta juca. Eta tacahe, ecaratacava eta epanereruana apaesa táurivaina eta eyujarasiranaya. **8** Tiápajucavayarehisera ichape eta émunajirisiracacayare éti. Te yátupihi eta émunajirisiracacahi, máejerareya eta eperdonachiracacaya eta jácani éjecapiravana. **9** Evapinavaya eta ejacapiracacaya, te epaipiuchacaca te epenana. **10** Ema Viya tíjaracahevacaripa eta ítucaquenepachuhi. Tacahe, yátupina ítauchaya eta ecaemataneasiracacahi te mamirahu. **11** Eti máimitureana ema Viya eta échajisira, ecuneuchava échajica yátupi eta máechajiriruvana éma. Eti ímicatarahiana ítátivaca ena echamuriana, vahi éñamaimahi eta etumeva máijararuhehi ema Viya. Étavenehi éhisirahi ema Viáquenu Jesucristo, tamutu tauri eta jácani íchaqueneana apaesa nacunacha ema Viáquenu namutu ena tímahaheana. Éma, ¡téavicavahi eta macunachacarevahi! ¡Téavicavahivare eta máitupajijiásiravahi eta máechirahavihi tiuri! ¡Máitavacacahivare eta véhisiraya éma! Amén.

*Vahi ecuavamirahu eta ecatajívairaya táichavene  
eta éhisirahi ema Jesucristo*

**12** Némunaruqueneana nuparapenaveana, vahi ecuarami eta muracairaya eta iátajivanayare, tímicutijiricavayarehi táramicarehini eta eyehe.

**13** Evapinavachucha taicha ecapayayaracahi eta macatajivairahi ema Cristo apaesa evapinava te jena sácheyare eta enecapirayare éma eta máucupaisiraya mámirayarepahi eta majaraiva.

**14** Te náumehahepuca máichavenénahi ema Cristo, téavicavayare eta iúricacarevaya éti. Taicha tiávahácaheyare ema Espíritu Santo, másihaquenehi te majaraiva ema Vicaiyaquene. Tayanapane náepurupuca éma, étisera ecunachahi éma. **15** Te etiarihipuca eti ecatajivahi náicha, tacuijasera étaimahi tiviuchahémahi jácani ecapahivainahini, íámeraivainahipucáini, váhivare étaimahi tiviuchahémahi jácani ímisiapirasiravainahipucáini tayehe eta náichaqueneana nácani apanana achaneana.

**16** Étisera, te ecatajivapuca táichavenénahi eta éhisirahi ema Cristo, vahi ecutsiriha. Evapinavachucha, ehasulupayachavare ema Viya tayehe eta ecaijarerahi eta máijare ema Cristo.

**17** Puiti juca sácheana viávacurehi, táitecapaurehaviripa ichape eta vicatajivairayare, mavarairahi ema Viya vímereuchava eta viúriva víti machichanaveana. Énasera ena masuapajirairahanahi eta náichuirahi ema Viya, páureanasami taicha tiápajucava eta nacatajivairaya, ichape eta náicuñaya. **18** Ichape eta vicatajivairahi te juca apaquehe viti macuchucureanayarehi ema Viya. ¡Páureanasamisera ena achaneana

masuapajirairahana, váinarajiqueneanahivare! ¡Ichapepanayare eta nacatajivairaya! <sup>19</sup> Puiti viti véhicanahi ema Cristo, ichape eta vicatajivairahi. Váhisera vicainajiruvaimahi. Vímiyanavayarehi vicha eta táuriqueneana. Vácasiñava mayehe ema Vicaiyaquene eta majaneasirahavihivare, taicha éma, tétavicavahi eta máitauraivahi.

## 5

### *Ema Pedro maconsejachavaca ena machamuriana*

<sup>1</sup> Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nútiripa pastornuhi. Énerichuvare testigonuhi eta nímararasirahi eta macatajivairahi máepenirahí eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya viávihayare te majaraiva ema Cristo te táitecapa eta machaviraya. <sup>2</sup> Tauri eta ejaneasiravacaina namutu ena vichamuriana, taicha éna tímicutijiricavahi uvesanainahini mayehe ema Viya. Ítauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi ecuyacujiequenehavaca. Váhivare ecupanerecha ecavacha. Evapinavayaresera eta ecaemataneasiravacaya. <sup>3</sup> Váhivare ímipananájicavacáimahi taicha vahi ecavanaravacahini. Ímerecayarehisera eta iúrvaya nayehe, apaesa éna náehica eta iúrvanahi. <sup>4</sup> Apaesa te machavapa ema yátupiquene Pastor

eta viyehe, tétavicavaya eta macunachiraheya. Tíjaracahenapa éma eta evachayare ícuchihi. Máiitavacacainapa eta ecachaneraya éma te mávihahi eta te majaraivahi.

<sup>5</sup> Eti apanava eti amaperuana, nuconsejachahe: Esuapayare eta navanesiraheana ena víyarahana. Emutuyare esuapacaca. Mánsuhénahi. Taicha ema Viya vahi majapanuimahi ena ticasíñavayairicana. Tétavicavasera eta majapanuiravacaya ena mánsupanerueruanahi. <sup>6</sup> Te ímereca eta emansuvavacahi tayehe eta ecasiñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásicha, tétavicavayare eta iúrisamurevaya. <sup>7</sup> Te tatiarihipuca eta éñamiravana, emetaca tamutu ema Viya. Éma, ticanaracaheyare taicha tétavicavahi eta máeñamiravahi eta eyehe.

<sup>8</sup> Ecuneuchava yátupina. Ejaneacavahivare, taicha ema viánarahi Váinarahi, macuti eta táiñehiquene sárare tatanujiriricahi eta tanicayarehi. Ene macahehi éma, matanucahi ena máquipairuanayare. <sup>9</sup> Eta tacahe, túmehéna ecanarairayare éma, machu máquipaicahe. Ácasíñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraina, ecutiyare eta nacamichirahi ena vichamuriana ticavasanahi te tamutu avasareana. <sup>10</sup> Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca

sácheana. Émasera ema Viya, tétavicavahi eta majapanuraivahi. Éma, tímararacahehi eta ecamichirahi; tásicha éma, tíjaracahenapa eta evayuchiravainapaicha eta etumevaya. Tájina ticayayacahemahi máicha. <sup>11</sup> Éma, ¡máitavacacahí eta macunachacarevahí! ¡Macachuricahi eta máitupajijiásirava, máitavacacahivare éta! Amén.

*Eta táichecuaraqui eta macartane ema Pedro*

<sup>12</sup> Ímati emutu ema vichamuri Silvano. Éma, tétavicavahi eta máitauraivahi te tamutu. Puiti, émahi ema tiáminanurihi eta juca nucartane. Núti, ánipichichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupihi eta vicaijuheirahi me Viya táicha.

<sup>13</sup> Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecuthihi eti eta manerejisirahehi. Téchajicahehivare ema nuchicha Marcos. <sup>14</sup> Núti, eta néchajirisirahehi éti nuchamuriana, nuvaraha nétsararecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, máijaracahehini tanaraca tamutu eta epanereruana emutu éti machaneranahi ema Viáquenu Jesucristo.

Tamutupa eta juca néchajiriruvahi eyehe.

**Eta Táurinaquene máechajiriruvahi ema Viya eta  
viyehe, ticaijare puito Eta Nuevo Testamento  
New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ignaciano

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

**2014-04-25**

---

**PDF generated using Haiola and XeLaTeX on 11 Nov 2022 from source files  
dated 29 Jan 2022  
332465cd-916c-5bfc-8721-b0114be92360**